
МАСЪУЛИЯТЛИ ВА ШАРАФЛИ БУРЧ

Тарихан қисқа даврда юртимизда қонунийлик ва ҳуқуқ-тартиботни такомиллаштиришнинг институционал ҳамда ҳуқуқий асослари шакллантирилди. Бу эса, ўз навбатида, жамиятда адолат ва инсон манфаатлари устуворлигини қарор топтиришда, коррупция, бюрократия сингари иллатларга қарши кескин курашишда муҳим аҳамият касб этаяпти.

Дарҳақиқат, давлат ва жамият ҳаётида қонунийлик ҳамда қонун устуворлиги таъминланиши ижтимоий-иқтисодий ислохотларнинг самарадорлигини оширишда ҳал қилувчи ўрин тутади. Бинобарин, адолат ҳукм сурган жойда тинчлик бўлади, халқнинг давлатга, унинг институтларига ишончи ортади, Ватан тақдири ва келажагига дахлдорлик туйғуси юксалади.

Албатта, мамлакатда қонунийликни мустаҳкамлашда, фуқароларнинг ҳуқуқларини, жамият ва давлатнинг қонун билан қўриқланадиган манфаатларини ҳимоя қилишда, аҳолининг ҳуқуқий маданиятини оширишда ҳамда ҳуқуқбузарликлар профилактикасида прокуратура органлари зиммасига катта масъулият юкланади.

Давлатимиз раҳбари томонидан 2016 йил 19 декабрь куни имзоланган “Ўзбекистон Республикаси прокуратура органлари ходимлари кунини белгилаш тўғрисида”ги Қонунга мувофиқ, 8 январь Ўзбекистон Республикаси прокуратура органлари ходимлари кунини сифатида белгилангани ушбу соҳа вакиллари фаолиятини юксак даражада эътироф этган ҳолда, уларнинг ўз зиммасидаги масъулиятли вазифаларни самарали бажариши учун рағбат бағишлайди.

Маълумки, 1992 йил 8 январда Биринчи Президентимиз томонидан “Ўзбекистон Республикаси прокуратураси органлари тўғрисида”ги Фармон қабул қилинган эди. Ўтган давр мобайнида мазкур ҳужжатга биноан аниқ чора-тадбирлар амалга оширилди. Энг аввало, прокуратура фаолиятини ислоҳ қилиш, уни собиқ тузум давридаги партиявий элитанинг жазолаш қуроли эмас, балки қонунларнинг қатъий ижро этилишини, мамлакатимизда демократик ислохотларнинг изчил ривожланишини, инсон ҳуқуқларини таъминлайдиган органга айлантириш саъй-ҳаракатларига устувор эътибор қаратилди. Хусусан, “Прокуратура тўғрисида”ги Қонунга мувофиқ, прокуратуранинг инсон ҳуқуқ ва эркинликлари, унинг қонуний манфаатларига риоя этилишини таъминлаш учун масъулияти кучайтирилди.

Давлатимиз раҳбарининг халқ хизматидаги давлат идоралари, шу жумладан, прокуратура органлари ходимлари ҳам, авваламбор, дунёқарашларини ўзгартиришлари лозимлиги борасидаги танқидий сўзлари замирида “Инсон манфаати ва ҳуқуқлари ҳар нарсадан устун” деган ғоя ётганлигини аминманки, ҳар бир ҳуқуқий идора вакили тушуниб етди.

Вилоятимиз прокуратураси вакиллари ҳам айни жараёнда жинойтчилик ва ҳуқуқбузарликларни бартараф этиш, қонунийликни таъминлашдек масъулиятли ва шарафли бурчни сидқидилдан адо этмоқда. 8 январь Ўзбекистон Республикаси прокуратура органлари ходимлари кунини этиб белгилангани барча бўғиндаги прокуратура органлари, хусусан, вилоят прокуратураси ходимларига ҳам алоҳида фахр ва ғурур бағишлайди. Касб байрами муносабати билан барча ҳамкасбларимизни қонун ҳимояси йўлида ҳамиша собит бўлишларини, мустақил мамлакатимиз ривожини, халқимиз тинчлигини йўлида астойдил иш юритишларини тилаб қоламиз.

Анваржон НАЗАРОВ,

вилоят прокурорининг катта ёрдамчиси,

матбуот хизмати раҳбари.